

I. DISPOSICIÓNS XERAIS

CONSELLERÍA DE PESCA E ASUNTOS MARÍTIMOS

Orde do 3 de maio de 2007 pola que se modifica a Orde do 26 de outubro de 2004 pola que se regula a alternancia de artes para embarcacións que pesquen en augas da Comunidade Autónoma de Galicia.

A Orde do 26 de outubro de 2004 pola que se regula a alternancia de artes para embarcacións que pesquen en augas da Comunidade Autónoma de Galicia prevé que todas as embarcacións en Galicia poderán dispoñer dun número máximo de 5 artes de pesca no seu permiso de explotación que se manterán, con carácter xeral, ata a renovación do citado permiso, en cuxo momento o armador poderá solicitar o cambio de arte baixo determinados requisitos.

Así mesmo é posible revisar as artes dos permisos de explotación antes da súa renovación, logo do ditame do Comité Científico Galego de Pesca.

Porén, non se dispón dun mecanismo áxil e flexible que permita outorgar cambios de modalidade de pesca que teñan en conta o estado dos recursos, a evolución e o grao de consumo de cotas de pesca asignadas a España pola Unión Europea, o nivel de esforzo pesqueiro, a situación socioeconómica do sector pesqueiro e as condicións do mercado, todo iso en tempo real.

Por outro lado, é conveniente dar un trato diferenciado aos supostos de cambio de artes derivados da participación nun plan de explotación, xa que este sistema de xestión permite dispor de información máis directa e fiable acerca da evolución das pesqueiras, o que facilita a asignación de artes de pesca en función dos resultados da campaña. Así, a autorización para participar nun plan de explotación pasa por unha avaliación previa na que se soliciten informes de viabilidade desde o punto de vista técnico, biolóxico e legal, logo da cal a autorización para o emprego da arte debería ser automática.

Con base no exposto considérase necesario establecer as disposicións necesarias que permitan cambiar temporalmente a modalidade de pesca en función das condicións de cada momento, así como recoñecer as peculiaridades na asignación de artes sometidas a plans de explotación.

Por todo o anterior, unha vez consultado o sector e con base nas atribucións que teño conferidas,

DISPOÑO:

Artigo 1º

Engádense os artigos 2 bis e 2 ter á Orde do 26 de outubro de 2004 pola que se regula a alternancia de artes para embarcacións que pesquen en augas da Comunidade Autónoma de Galicia, coa seguinte redacción:

«Artigo 2º bis: artes sometidas a plan de explotación.

A inclusión nun plan de explotación dos regulados no Decreto 423/1993, do 17 de decembro, polo que se refunde a normativa vixente en materia de marisqueo, extracción de algas e cultivos mariños, ou no Decreto 424/1993, do 17 de decembro, polo que se aproba o regulamento da actividade pesqueira e das artes e aparellos de pesca permisibles en Galicia, suporá a autorización para o emprego da arte a que se refira o dito plan. Se a embarcación contase no seu permiso de explotación con 5 artes distintas á utilizada no plan, o armador deberá renunciar a unha delas para que se autorice a súa inclusión no plan de explotación. A renuncia terá os seus efectos durante a vixencia do plan de explotación, e unha vez finalizado este recuperarase a arte renunciada de xeito automático.

Artigo 2º ter: cambios temporais de modalidade.

1. A Dirección Xeral de Recursos Mariños da Consellería de Pesca e Asuntos Marítimos poderá autorizar cambios temporais a modalidades ou artes de pesca distintos aos que figuran no permiso de explotación, en función do estado dos recursos e da idoneidade das embarcacións, consultado o sector pesqueiro, por períodos de tempo non superiores a 6 meses. Non obstante, en casos excepcionais e sempre que o estado dos recursos o permita, estas autorizacións poderán prorrogarse a solicitude do interesado.

2. Durante o período de vixencia desta autorización non poderá utilizarse ningunha outra arte. O retorno á modalidade de orixe producirase polo transcurso do prazo da autorización ou da súa prórroga ou ben mediante o emprego de calquera das artes incluídas no permiso de explotación, o cal deixará automaticamente sen efecto a autorización para cambio de modalidade.

3. As modalidades ás que se pode solicitar cambio de modalidade son:

a) Aparellos de anzol: liña e palangrillo.

b) Artes de enmalle: trasmallos, miños e betas».

Artigo 2º

Modifícase o parágrafo 1 do artigo 7 da Orde do 26 de outubro de 2004 pola que se regula a alternancia de artes para embarcacións que pesquen en augas da Comunidade Autónoma de Galicia, que quedará redactado como segue:

«1.Cando un patrón ou armador que teña varias artes no seu permiso de explotación desexa pescar cunha delas diferente á que está usando, solicitará da confraría de pescadores á que estea asociado a inscrición da arte no libro de rexistro da actividade pesqueira. O cambio de modalidade, así como o retorno á modalidade de orixe, anotarase no libro de rexistro nas mesmas condicións que as demais artes autorizadas no permiso de explotación».

Disposicións derradeiras

Primeira.-Facúltase o titular da Dirección Xeral de Recursos Mariños para ditar as disposicións necesarias para o desenvolvemento e a aplicación desta orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 3 de maio de 2007.

Carmen Gallego Calvar
Conselleira de Pesca e Asuntos Marítimos

III. OUTRAS DISPOSICIÓNS**CONSELLERÍA DE PRESIDENCIA,
ADMINISTRACIONES PÚBLICAS
E XUSTIZA**

*Resolución do 17 de abril de 2007, da
Secretaría Xeral de Relacións Exteriores,
pola que se crea e regula o rexistro de ofi-
cinas autonómicas no exterior.*

A disposición adicional primeira do Decreto 224/2006, do 30 de novembro, polo que se regulan as delegacións da Xunta de Galicia no exterior, establece que no prazo de tres meses contados a partir da súa entrada en vigor, a Secretaría Xeral de Relacións Exteriores creará e regulará o rexistro de oficinas autonómicas no exterior a que accederán, logo do oportuno inventario, aquelas oficinas de titularidade autonómica ou que exerzan calquera tipo de representación exterior baixo mandato dunha autoridade autonómica, que foran regulamentariamente creadas.

No citado rexistro consignarase o acto xurídico de creación da oficina, a identificación nominativa das persoas físicas que nela desenvolvan actividades, a localización e características das súas instalacións e o orzamento anual de que dispoñan para o seu funcionamento.

Xa que logo, logo de efectuar as consultas oportunas con todos os departamentos da Administración autonómica, cómpre dar cumprimento ao disposto naquela disposición.

Na súa virtude, logo do informe da Asesoría Xurídica Xeral,

RESOLVO:**Artigo 1º**

Créase o rexistro de oficinas autonómicas no exterior.

Artigo 2º

A levanza do rexistro correspóndelle á Secretaría Xeral de Relacións Exteriores. Para tal efecto realiza-

rá os actos de inscrición, rectificación ou cancelación dos asentos, de oficio ou por solicitude de:

a) A Xunta de Galicia a través dos seus departamentos.

b) Os organismos autónomos galegos.

c) As entidades de dereito público con personalidade xurídica propia, vinculados ou dependentes da Administración autonómica.

d) As sociedades mercantís con capital público maioritario da Administración autonómica, dos seus organismos autónomos e das demais entidades de dereito público.

e) As fundacións ás que se refire a Lei 10/1996, do 5 de novembro, de actuación de entes e empresas nas cales ten participación maioritaria a Xunta de Galicia, en materia de persoal e contratación.

f) Os consorcios cuxos órganos de decisión estean integrados maioritariamente por representantes designados pola Xunta de Galicia.

Artigo 3º

1. No rexistro inscribíranse todas aquelas oficinas de titularidade autonómica ou que exerzan calquera tipo de representación exterior baixo mandato dunha autoridade autonómica, que foran regulamentariamente creadas.

2. Así mesmo, a creación de oficinas sectoriais en estados non cubertos por unha delegación da Xunta de Galicia, consignarase de oficio no rexistro.

Artigo 4º

No rexistro consignarase o acto xurídico de creación da oficina, a identificación nominativa das persoas físicas que nela desenvolvan actividades, a localización e características das súas instalacións e o orzamento anual de funcionamento.

Artigo 5º

Os datos do rexistro serán públicos e o acceso a eles polos cidadáns exercerase nos termos e condicións establecidos pola Lei 30/1992, do 26 de novembro, de réxime xurídico das administracións públicas e do procedemento administrativo común.

Disposición adicional

Única.-Apróbase o inventario das oficinas autonómicas no exterior existentes, que se publica como anexo a esta resolución.

Disposición derradeira

Esta resolución entrará en vigor aos vinte días da súa publicación.

Santiago de Compostela, 17 de abril de 2007.

Santiago Gómez-Reino Lecoq
Secretario xeral de Relacións Exteriores